

45. Wer nicht nach vnsern sittn
Nach vnser ee ist pesnyten
Der schol von vns geschaiden sein
Vnd wir von im nu tun schein
Ob wir mit ew schulln genesen
50. Vnd ain volkh mit lieb wesen
Nu so chert zu vns mit dem snyt
Der chunig volgt in gern damit.
Vnd fur do mit frauden haym.
Der chunig was warden enain
55. Das in der stat all man
Di in mit dinst gehorten an
Mit gemainkhleichen sitten
Nach der ee sich do pesniten
Als in vor das was fur gelait
60. Da sich das volkh nu als pesnait
Durch der frawdē wider lon
Jacobs Sun Symeon
Vnd sein prueder levi
Vnd di den paiden warñ pey
65. Dy gingen do an dem dritten tag
Do das volkh an sunder chlag
Vnd froleich an ir hochtzeit
Warñ vnd vnberait auff streit
Vnd mit gemach rue phlagen
70. Vnd nach frauden slaffen lagen
Do chomen si in di stat vnd erslugen
All di mannes nam trugen
Paydeu arm vnd reich
Vnd nam[en] do gewaltikhleich
75. Swas si da gutes funden
Si namen auch an den stunden
In vanckhnuzz di man
Weib vnd chind furten si dan
Vnd slugen vil manigñ da zetod
80. Ir zorn in noch mer gepot
Das si verbüsten Sichem di stat
Also wart si an frauden mat
[Jacob west an] diser geschicht
Seiner Sun willn nicht
85. Ee ez geschach vnd vol cham
[Er sprach do er ez] vernam
Vil traurikh vnd frauden frey
Sein Sun Symeon vnd leuy

Sp. e.